



CENTRALE BANK VAN ARUBA

## **Amplio likides na banconan comercial den februari 2021**

Comunicado di prensa

Durante e reunion di 1 di april 2021 y despues di a revisa dato economico y monetario mas recien, e Comite di Maneho Monetario (CMM)<sup>1</sup> di Banco Central di Aruba (BCA) a dicidi pa mantene e porcentahe actual di e tasa di e “reserve requirement” (reserva rekeri) na 7,0 porciento. E tasa di e reserva rekeri ta e cantidad minimo di reserva cu banconan comercial mester mantene na BCA y ta igual na 7,0 porciento di nan obligacionnan cu ta vence den menos di 2 aña. A considera e siguiente informacion y analisis pa yega na e decision aki.

### *Reservanan internacional*

E reservanan internacional (incluyendo e diferencia di revaluacion di oro y reserva di divisa) a aumenta cu Afl. 24,3 miyon te cu y incluyendo 19 di maart 2021, compara cu fin di december 2020. E aumento aki ta debi na fianza di gobierno ricibi for di exterior, entradanan relata na turismo y otro fiansananan di exterior ricibi pa sector priva. Reservanan oficial di divisa a nota un caida di Afl. 39,3 miyon. Consecuentemente, e reservanan oficial y e reservanan internacional a yega te na, respectivamente, Afl. 2.163,9 miyon y Afl. 2.377,6 miyon riba 19 di maart 2021. Di e manera aki e reservanan a keda na un nivel adecua ora di compara nan cu e nivel critico di 3 luna di pago registra ariba cuenta corriente y e metrico di ARA<sup>2</sup> di IMF (Grafico 1).

---

<sup>1</sup> E CMM a ser institui na mei 2010 pa periodicamente evalua y determina e maneho monetario di BCA. Adicionalmente, CMM ta aspira pa mehora e transparencia di maneho monetario.

<sup>2</sup> E metrico di IMF ARA ta referi na “Assessing Reserve Adequacy Metric” di Fondo Monetario Internacional cual ta midi con adecua e reservanan oficial ta door di compara esaki cu un averahe a base di peso di placa den circulacion, fianza entre companianan liga na otro, debe riba termino cortico y termino largo, y exportacion di bienes y servicio.




Grafico 1 – Desarrollo den reservan oficial y internacional.

### Desaroyonan den credito

Den februari 2021, credito total a baha cu Afl. 12,7 milyon of 0,3 por ciento compara cu fin di 2020. Esaki ta debi na e componentenan “fiansa na individuo” (-Afl. 12,6 milyon/-0,7 por ciento) y “otro” (-Afl. 3,8 milyon/-0,7 por ciento). E categoria “fiansa na individuo” a cay pa motibo di un demanda mas abou pa credito na consumidor. Mientrastanto, otro inversion y e asina yama “accounts receivable and prepayments” teni na banconan comercial, a impacta negativamente e categoria “otro”. Di otro banda, “fiansa na empresa” a nota un crecimiento di 0,2 por ciento, causa pa credito ariba cuentanan corriente.

### Inflacion

Inflacion, basa riba Indice di Prijs di Consumo (CPI), tabata 1,9 por ciento mas abou na februari 2021 compara cu e mesun luna di e aña anterior (Grafico 2). Esaki tabata primordialmente causa pa prijsnan mas abou den e categorianan “recreacion y cultura”, “operacion di vivienda”, y “transporte”. E promedio di inflacion di 12 luna a baha te na -2,2 por ciento na februari 2021. E promedio di inflacion di 12 luna, excluyendo e componentenan di energia y cuminda, tabata -0,7 por ciento na februari 2021.




Grafico 2 - Inflacion

### Likides prudencial

E likides prudencial di e banconan comercial (34,5 por ciento), cual ta midi e cantidad di activo likido compara cu e activo total netto di e banconan comercial, a keda na un nivel comfortabel den februari 2021, compara cu e likides minimo rekeri di 15,0 por ciento.

Banco Central di Aruba

14 di mei 2021